



Sabtu, 06 Maret 2021

Ogen: Kuan-kuanen 16:1-3



Rusaha Ras Ertoto



Tidak ada yang tidak mungkin di dunia ini apa yang kamu inginkan pasti bisa kamu dapatkan asal sabar, usaha, ikhlas dan doa. Enda perkatan motivator si mereken semangat man banta lako tetap rusaha ibas ndalani kegeluhen. Payo, selaku manusia si itepa bagi gambar Dibata, ipesusurNa kuasaNa man banta lako tetap erdahin mpekena-kena kerina tinepa. Rikutken ogenta sendah maka manusia banci ersura-sura, tapi Dibata kap erbahan keputusenna. Ertina i bas kuasa ras kengasupen si ibereken Dibata, manusia ibere kepercayaan lako berkarya, berinovasi, ngembangkan potensi ras usaha si enggo lit. Tapi perlu metenget, sura-sura jadi kalak sukses labo erdosa, sura-sura lako ngembangkan usaha gelah reh majuna epe labo salah, tapi siksiki sura-suranta e payo dengalah bagi siisuraken Dibata entah lahang. Inget maka kita terjeng manusia tinepa Dibata, labo kita si nepa dirinta, jadi perlu kemeteruken ukur. Usaha kai pe si ateta si lakoken tetap erpersukuten man Dibata janah usahanta e pe bagi si ngena ate Dibata. Enterem kalak si rusaha, lanai ingetna Dibata, lanai ertoto, lanai ku gereja, lanai inget perpulungen ras teman sada kesain. Tutus kal atena bas usahana, janah kinibeluhenna akapna si erbahansa berhasil usahana e, lupa ia maka si ilakokenna kerina i bas doni enda terjeng doni ngenca, banci lesap ras bene.

Umpamana, sekalak perjuma situtus kal bas rusaha, isuanna jong sada hektar, emaka ibahanna lumbung si galang nampung jong e. Ipekenana jong e alu mehuli seh rani melala pe buahna, meriah akapna emaka ulihina ka suanna jong bas juma ndai, tambahina ka belang jumana ras suanna ka kol. Tutus kal atena ngusahai jumana e, iurusna alu mehuli seh rani melala ulihna jong ras kol ndai. Erkiteken sie ipegalangina ka lumbungna ingan jong ras kol e. Emaka tukurna ka taneh terbelangen, suanna ka jong, kol ras wortel. Senyum ras tawa kal ia, nina ‘aku sukses,’ emaka ibangunna ka lumbung tergalangen, alu sura-sura dem ka pagi lumbung e. Bagem lalap ia ersura-sura terbelinen ras terbelinen tapi la ingetna erpersukuten man Dibata. Kenca rani enggo pulung kerina ertana ndai i bas lumbung, melala ulihna, kumat pinakit jantungna, pecah pembuluh dareh bas otakna, dungna mate. Megati kita lupa, maka kita terjeng tinepa ngenca terbatas gegehta.

☞ *Banci ersura-sura tapi erpersukuten tetap man Dibata*